

每週經課朗誦經文(巴克禮漢羅/教羅)2013/12/08

共同經課 - 1

以賽亞書十一章一節~十節

1 Tùi 耶西 ê 樹頭 beh 發一支 iⁿ, 對伊 ê 根所生 ê 枝 beh 結果子。2 耶和華 ê 神 beh tiàm tī 伊, 就是智慧 kap 聰明 ê 神, 計畫 kap 能力 ê 神, 智識 kap 敬畏耶和華 ê 神; 3 伊 beh 掠敬畏耶和華做歡喜; 伊 m̄ 是憑目矚所看見來審判, 亦 m̄ 是憑耳孔所聽見來擬斷; 4 伊 beh 用公義審判 sòng-hiong 人, 用正直擬斷世上謙卑 ê 人; 用嘴中 ê 拐 phah 世界, 用嘴唇 ê 氣 thài 死 pháiⁿ 人。5 公義 beh 做伊 ê 腰帶, 信實 beh 做伊 ê 身軀 ê 帶。6 豺狼 beh kap 綿羊 á 相 kap toà, 豹 kap 山羊 kiáⁿ 相 kap 倒 teh; 牛 á kap 細隻獅 kap 肥 ê cheng-siⁿ, 做細漢 ê gín-ná beh 牽 in。7 牛 kap 熊 beh 相 kap 食, in ê kiáⁿ beh 相 kap 倒 teh; 獅 beh 食草親像牛。8 食奶 ê gín-ná beh thit-thô tī 惡蛇 ê 孔口; 斷奶 ê gín-ná beh 下手 tī 毒蛇 ê 穴。9 Tī 我 ê 聖山 ê 遍地, 的確無損傷無陷害; 因為認 bat 耶和華 ê 知 bat beh 充滿地上, 親像水淹滿 tī 洋海。10 到 hit 日, 耶西 ê 根頭 khiā 做萬百姓 ê 大旗, 列邦 beh 歸 oá 伊; 伊安歇 ê 所在有大榮光。

共同經課 - 2

詩篇七十二篇一節~七節, 十八節~十九節

1 所羅門 ê 詩。1) 上帝 ah, 求你將你 ê 判斷賞賜王, 將你 ê 公義賞賜王 ê kiáⁿ。2 伊 beh 照公義審判你 ê 百姓, 照公平判斷你 hiah-ê 困苦 ê 人。3 大山 beh 因為公義, hō 百姓平安, 山 á 也 beh án-ni。4 伊 beh kā 百姓中困苦 ê 人判斷, 伊 beh 救 sòng-hiong ê 人, 伊 beh teh 碎暴虐 ê 人。5 人 beh 敬畏你日久月長, 直到萬世代。6 伊 beh 降臨親像雨落 tī 已經割 ê 草, 親像及時 ê 雨潤澤土地。7 Tī 伊 ê 日子義人 beh 興旺; 大大平安 kap 月平久。18 耶和華上帝, 就是以以色列 ê 上帝, 只有伊行奇異 ê 事, 應該 o-ló 伊。19 願伊榮光 ê 名永遠受 o-ló; 願伊 ê 榮光充滿全地。 A-bēng, koh A-bēng。

共同經課 - 3

羅馬書十五章四節~十三節

4 因為早所記載 ê, lóng 是 beh 教示咱, chiah 來記; hō 咱 tùi 吞忍, tùi 聖經 ê 安慰, 來得 tiòh òng 望。5 願賞賜吞忍安慰 ê 上帝 hō lín 大家同心志照基督耶穌, 6 hō lín 一樣心一樣嘴榮光上帝, 就是咱 ê 主耶穌基督 ê 父。7 所以 tiòh 相接納, 親像基督也有接納 lín, 致到榮光歸 tī 上帝。8 因為我講, 基督為 tiòh 上帝 ê 真實 bat 做奉割禮 ê 人 ê 差用, beh 堅固所應允列祖 ê; 9 也 hō 外邦人為 tiòh 憐憫歸榮光上帝, 照所記載, 講, 因為 án-ni 我 tī 外邦中 beh 稱呼你, 唱歌 o-ló 你 ê 名。10 Koh 講, Lín 外邦人, tiòh kap 伊 ê 百姓同歡喜。11 又 koh 講, Lín 眾外邦 tiòh 稱讚主, Lín 萬百姓 tiòh o-ló 伊。12 又 koh 以賽亞講, beh 有耶西 ê 根頭, Kap 興起來治理外邦 ê, 外邦 beh oá 靠伊來有 òng 望。13 願賞賜 òng 望 ê 上帝 hō lín tùi 信來充滿 tak 樣 ê 歡喜平安; hō lín tī 聖神 ê 權能得 tiòh 滿滿 ê òng 望。

共同經課 - 4

馬太福音三章一節~十二節

1 當 hit 時, 行洗禮 ê 約翰來, tī 猶太 ê 曠野宣傳講, 2 Lín tiòh 反悔; 因為天國近 lah。3 Chit 人就是主託先知以賽亞所指 ê, 講, 有 teh 叫 tī 曠野 ê, 伊 ê 聲講, 備辦主 ê 路, 修直伊 ê 小路。4 Chit-ê 約翰穿駱駝毛 ê 衫, 腰 há 皮帶; 伊所食是草蜚 kap 山野 ê 蜜。5 Hit 時耶路撒冷 kap thong 猶太, 以及約旦四方 ê 眾人出來就近伊; 6 tī 約旦河 tùi 伊受洗禮, 認 in ê 罪。7 約翰看見法利賽 kap 撒都該人, choē-choē 就近伊 ê 洗禮, 就 kā in 講, 毒蛇 ê 類 ah, chī-chūi-á 指示 lín 閃避將來 ê 受氣 ah? 8 所以 lín tiòh 結 hit 號合 tī 反悔 ê 果子。9 莫得家己 phah 算講, 有亞伯拉罕做阮 ê 父; 因為我 kā lín 講, 上帝會 tùi chiah-ê 石頭出 kiáⁿ 孫 hō 亞伯拉罕。10 Taⁿ 斧頭已經 hē tī 樹頭; 見若樹無結好果子 ê, 就 chhò 伊, hiat 落火。11 我用水 kā lín 行洗禮, beh hō lín 反悔; 若是 tè 尾我來 ê, 比我 khah 有權能, 伊 ê 鞋我亦 boē 堪得 thèh; 伊 beh 用聖神 kap 火 kā lín 洗。12 伊 ê 手 thèh 簸箕, beh 將 hit 場一盡簸, 收伊 ê 麥入倉; 若是麥 hiūⁿ 就用 boē-hoa ê 火燒伊。